

CYFARFOD:	CYNGOR LLAWN
DYDDIAD:	04 Hydref 2018
TEITL:	Cynllun Hybu'r Gymraeg yng Ngwynedd 2018-2023
PWRPAS:	Cyflwyno'r Cynllun Hybu terfynol a'r rhaglen waith arfaethedig i'w cymeradwyo a'u mabwysiadu.
AELOD CABINET:	Y Cyngorydd Nia Jeffreys
AWDUR:	Gwenllian Mair Williams Rheolwr Gwasanaethau'r Gymraeg

1. Cefndir

- 1.1 Mae Safon 145 o Safonau'r Gymraeg, Mesur y Gymraeg (Cymru) 2011, yn gosod dyletswydd statudol ar y Cyngor i ni lunio strategaeth 5 mlynedd sy'n esbonio sut yr ydym yn bwriadu mynd ati i hybu'r Gymraeg ac i hwyluso defnyddio'r Gymraeg yn ehangach yn ein hardal.
- 1.2 Mae Cynllun Hybu'r Gymraeg yng Ngwynedd wedi cael ei ddatblygu er mwyn bodloni'r gofyn hwnnw, ac yn dangos ymrwymiad y Cyngor i hybu'r Gymraeg ym mhob rhan o fywyd trigolion y sir.
- 1.3 Cafodd strategaeth ddrafft ei llunio yn gynharach eleni ar sail ymgynghori gydag aelodau a swyddogion perthnasol ac ar ddadansoddiad o strategaethau a chynlluniau perthnasol yn y maes, a bu ymgynghori cyhoeddus ar gynnwys y ddogfen ddrafft honno, wedi iddi dderbyn cymeradwyaeth gan Gabinet y Cyngor, rhwng Ebrill a Mehefin 2018.
- 1.4 Mae'r Cynllun terfynol wedi ei ddiwygio yn sgil yr ymgynghori, gan gymryd rhai o'r materion a godwyd i ystyriaeth, ac mae rhaglen waith gychwynnol wedi ei llunio sydd yn manylu ar sut y byddwn yn mynd ati i weithredu ar y blaenoriaethau yn y Cynllun.
- 1.5 Mae'r Meysydd Blaenoriaeth yn y Cynllun Hybu terfynol a gyflwynir yn dilyn yn agos y meysydd gweithredu oedd yn y strategaeth flaenorol, ac hefyd yn ceisio adlewyrchu'r meysydd hynny y mae Strategaeth Iaith Llywodraeth Cymru, Cymraeg 2050, yn rhoi sylw iddynt.
- 1.6 Mae rhaglen waith gychwynnol yn rhoi syniad o'r camau cyntaf y byddwn yn eu cymryd ac yn seiliedig ar drafodaethau gydag adrannau perthnasol, a phartneriaid, er mwyn adnabod ffrydiau gwaith sydd yn ateb y blaenoriaethau, ac hefyd cyfleoedd ar gyfer cydweithio neu brosiectau o'r newydd.

- 1.7 Rhaglen waith ar gyfer y flwyddyn gyntaf yw hon, a bydd yn rhaglen waith fyw, gyda ffrydiau gwaith newydd yn cael eu hychwanegu wrth iddynt ddatblygu.
- 1.8 Cafodd y Cynllun Hybu terfynol a'r Rhaglen waith gychwynol ei chymeradwyo gan Gabinet y Cyngor ar y 18fed o Fedi 2018.

2. Camau Nesaf

- 2.1 Bydd grwpiau thematig yn cael eu sefydlu er mwyn cydlynu a gyrru'r gwaith yn ei flaen, a manylion am brosiectau neu gynlluniau newydd sydd yn cael eu cytuno gyda phartneriaid allanol o ganlyniad i'r grwpiau yn cael eu hychwanegu at y rhaglen waith.

3. Argymhelliad

- 3.1 Gofynnir i'r Cyngor dderbyn y Cynllun Hybu'r Gymraeg yng Ngwynedd 2018-2023 a'r rhaglen waith gysylltiedig ac i gymeradwyo cychwyn ar y gweithredu.